

Pelajar IPT berperanan terus maju negara

ALOR STAR, Khamis – Sultan Kedah hari ini meminta pelajar yang tamat pengajian tinggi dalam dan luar negara berbakti kepada masyarakat, termasuk memandu mereka ke arah menjadi ummah yang lebih maju.

Beliau berkata, tanggungjawab itu penting kerana secara langsung ia turut meningkatkan syiar Islam peringkat tempatan, kebangsaan dan dunia.

Menurutnya, sebagai pelajar Islam mereka wajar bertanggungjawab menyambungkan tugas untuk kepentingan agama, bangsa dan negara.

Berucap merasmikan majlis Hafluttakharruj (konvensyen) ke-3 Insaniah di Dewan Wisma Darul Aman, di sini hari ini, Sultan Kedah bertitah, pelajar mesti menjadi orang berguna kepada masyarakat dan negara.

Raja Muda, Raja Puan Muda dan Menteri Besar, Datuk Seri Syed Razak Syed Zain turut hadir.

Sultan Kedah turut menyampaikan diploma dan ijazah kepada 84 graduan, termasuk pelajar cemerlang, Siti Khadijah Mafinieding, menerima anugerah khas Sultan Kedah.

Siti Khadijah, 21, berasal dari Tawau, Sabah akan melanjutkan pengajian ke Mesir akhir tahun ini.